

史料旬刊

第十二期

史傳列傳

卷十二


中華民國十九年九月二十一日出版

史料旬刊第十二期

編輯所 故宮博物院文獻館

發行所 神武門外發售室

印刷所 京華印書局



價目表		郵費	
每旬一冊	四角	外埠	每期一角
預定半年 十八冊	六角	外國	每期二角
預定全年 三十六冊	十二元	本院發寄刊物均交郵局掛號遞送以免遺失	

本市 商務印書館 中華書局

上海 文明書局 世界書局及

天津 其他各大書店均有代售

史料旬刊第十二期目錄

羅教案 原件藏三所

(一) 永德摺

(二) 永德摺二

(三) 崔應階摺

臺灣黃教案 原件藏三所

(一) 崔應階摺三

(二) 葉相德摺

(三) 崔應階摺四

(四) 崔應階摺五

(五) 吳必達
葉相德 摺

(六) 余文儀摺

(七) 吳必達等摺

(八) 葉相德摺二

御史沈廷芳奏請仆毀前朝逆闖王振塑像摺 原件藏三所

河南桐柏縣天主教案 原件藏三所

(一) 阿思哈摺

(二) 阿思哈摺二

(三) 阿思哈摺三

乾隆朝外洋通商案 原件藏三所

(一) 楊應琚
錫年摺

(二) 楊應琚摺三

(三) 楊應琚摺四

(四) 鐘音摺

嘉慶朝軍機處議駁江蘇監生周斡條奏案 原件藏三所

(一) 軍機處摺

(二) 上諭

湖南省傳抄謄詞案 原件藏大高殿

(一) 方世儵摺

陝甘總督明山奏覆查明鳳翔八觀現存湮沒情形摺 原件藏大高殿

山東巡撫鄂容安奏參原任建昌道王柔摺 原件藏三所

江西巡撫胡寶瑤奏參都昌縣知縣顧綱摺 原件藏三所

羅教案

永德摺

浙江巡撫臣覺羅永德跪奏爲查獲羅教人犯先行恭摺奏聞事本年九月初一日先據仁和縣知縣王莊稟稱准江蘇長洲元和吳縣會札移開在蘇獲有主守羅教經堂之性海供出杭州孔聖橋有錢菴翁菴潘菴三處亦係羅教等因查省會地方並無孔聖橋聞夾道巷內有錢菴寶善橋有翁菴司馬渡巷有潘菴隨即飛馳密往各該菴查明俱係尼僧所供者係如來等佛所存經卷係金剛法華觀音等經並無羅教經像訊之尼僧僉供並非羅教等情臣當查羅教久有嚴禁當此查拿匪犯之時此等邪教最易藏垢納污必須嚴密訪查杭城雖無孔聖橋據查各尼菴亦非羅教但此外或尙有字音相類之菴堂地名潛奉羅教正未可定隨面諭該縣迅速確訪查拿旋於九月初三日據王莊稟稱訪聞北新關外拱宸橋地方有不僧不俗廟宇十餘處俱係供奉羅教羅經之所隨密赴該地在李菴內查獲羅像二軸羅經三箱又於劉菴內查獲羅經七部訊據李菴之劉天元劉菴之丁天佑等供稱尙有老菴即錢菴萬菴卽翁

菴王菴即潘菴及清涼菴等十餘處俱係奉依羅教職即當場曉諭各菴速將經卷呈首隨據住管老菴之朱光輝萬菴唐潮王菴王世洪陸雲菴繆世選八仙珠菴仲壽成周菴韓德山李菴李應選王菴周成龍虞菴虞少亭清涼菴高萬成等呈出羅經共計五十餘卷

硃批所查經像皆送京

又有滾盤珠菴陳起鳳劉菴宋

起文李菴李文閣菴沈世榮石菴吳吉士劉菴楊欽章菴戴成武黃菴黃裔祠彭菴彭應葵王菴丁文學劉菴張國柱等係附拜羅經並無經像收存亦自行投到皆係外省人氏查訊各菴皆係糧船水手回空居住之處內潘菴係錢塘地方已會同錢邑查起現在分別查究等情臣隨行提一千人犯經卷率同兩司及杭紹二府親加究訊經像來歷及如何輾轉傳授有無煽惑教誘聚衆並此外尙有何菴堂黨羽當據各犯供稱朱光輝所住之老菴本係錢菴因年久遂稱爲老菴又唐潮所住之萬菴即係翁菴因萬姓改建遂名爲萬菴王世洪所住之王菴即潘菴因續經王姓改建故改名王菴其餘劉天元所住之李菴丁天佑所住之劉菴及陸雲菴八仙珠菴滾盤珠菴劉菴李菴周菴閻菴石菴俱係錢菴分出又楊欽所住之劉菴李應選所住之李菴周成龍所住之王菴

及章菴黃菴虞菴彭菴皆自翁菴分出各習羅教又高萬成所住之清涼菴丁文學所住之王菴張國柱所住之劉菴係由潘菴分出內清涼菴係習大乘教俱不知始自何時從前共有七十餘菴聞昔年有密雲人錢翁二姓及松江人潘姓先創錢翁潘三菴爲糧船水手回空居住之所因糧船水手俱係山東北直各處人氏回空之時無處住歇疾病身死亦無處掩埋故創設各菴俾生者可以託足死者有地掩埋在菴者俱習羅教嗣因水手衆多續又分有七十餘菴自雍正年間前任李撫院禁止之後現止存剩二十餘菴所有經卷內陸雲菴十二部據住菴繆世選供係在蘇州徐涵輝家買來又正信經六卷查有姑蘇陳子衡刊賣字樣李菴一箱據住菴之劉天元供係上年水手王姓帶來不知名字餘俱供稱係舊日遺存每年糧船回空各水手來菴居住者每日給飯食銀四分平日僅止一二人管菴並無輾轉煽惑教誘聚衆之事販教之人有喫素念經者亦有不喫素不念經者經名苦工破邪金剛正信等項名目並無不法邪語又詰其掌教何人據繆世選供稱乾隆十八年在糧船上做水手到通州曾在一飯店內遇見一密雲縣人羅明中有七十多歲人家說他是羅教

子孫那時兩下都要起身也不曾拜從他又據高萬成供清涼菴係大乘教經名還源開心明證報恩等項其教聞係王師傅從前在北京盤山修行興教的至現在住菴之人皆供係年老或有病不能爲水手遂住菴管守并不曉得掌教亦從無爲匪不法等語僉供不移臣查雍正五年間前撫臣李衛曾訪聞浙幫水手皆信奉羅教杭州北新關外有菴堂三十餘處各船水手於冬月回空時在內安歇因恐盡行拆毀則此輩水手皆各省異籍之人飯舖不敢容留回空之日無所依歸止毀去經像禁止不許仍稱羅教在案其各犯所供菴堂係爲水手居止之說似非遁飾臣復檢閱現起經卷亦大率輪迴地獄勸人修行之鄙俚辭語別無悖逆不法邪術但此等邪教最易惑衆况糧船水手甚多皆係好勇鬥狠之徒聲應氣從亦易齊心生事卽如雍正五年查禁之後仍復收藏經卷供奉羅像若不從此嚴加究審

硃批是

將爲首皈教之人從重處治毀其

經像則衆不知儆蔓延崇信流弊無底縱或因水手無托足容留之處亦應毀去菴名改爲公所止許回空時暫爲棲止責令該管衛所幫弁稽查並禁止一切糧船不許再稱羅教等名色方可以散黨類而絕邪教除一面移咨江省查

拘賣經之徐涵輝陳子衡起取經板解浙質究銷毀並咨查直省有無密雲縣羅教子孫一體查禁一面再加細查此外有無羅教大乘無爲等教將現獲各犯細加研訊確實供情分別首從另行按擬具題外緣關拿獲邪教合先繕摺奏聞伏乞皇上睿鑒謹奏乾隆三十三年九月初十日硃批「已有旨了」

永德摺二

浙江巡撫臣覺羅永德跪奏爲遵旨拆毀羅教菴堂解送經像事竊浙省拿獲羅教人犯一案臣前於九月初十日恭摺具奏本月二十四日承准大學士公傳恒大學士尹繼善大學士劉統勳字寄內開乾隆二十三年九月十七日奉上諭據永德奏北新關外查出菴堂十餘處菴內收藏經卷供奉羅像每年糧船回空水手容留托足請將皈教之人從重處治毀其經像革除菴名改爲公所仍許水手回空時棲止等語所辦尙未盡妥協杭州各處經堂向係糧船水手所設借棲止爲名信奉羅教本應嚴禁從前雖經李衛查毀經像而房屋尙存以致故智復萌各庵內仍藏羅經羅像是其惡習難返非澈底毀禁不能盡

絕根株若僅如該撫所奏將菴堂改爲公所數年之後查察稍疎伊等勢必又將公所變爲菴堂總非正本清源之道至水手棲止之所原不必官爲籌畫此輩皆旗丁臨時雇募應用更非官丁可比卽或散居各處至期自能赴幫應雇何必爲之鰓鰓過計況有漕之處不止浙江一省卽如江南湖廣河南山東均有糧船均需水手並不聞皆有棲止公所何獨浙江爲然況此等游手好閑之人羣居一處必至滋生事端於地方又有何益著傳諭永德除將本案從重辦理外所有各菴堂概行拆毀毋得仍前留存復貽後患欽此遵旨寄信到臣同日又奉到原摺硃批已有旨了並於摺內聲叙呈出羅經共計五十餘卷之旁奉硃批所查經像皆送京又嚴加究審之旁奉硃批是欽此臣跪讀之下仰見睿慮周詳正本澄源之至意臣當卽欽遵諭旨檄行藩臬兩司將北新關外查出菴堂計二十三所委員概行拆毀不使留存其拆下各料物以及地基逐一估計召變造冊報部留充地方公用將來回空糧船水手到浙飭令各幫押運守干等官諭令各散投寓所毋許聚處滋事并時加嚴查如有皈依邪教陽奉陰違之事卽嚴加究治以絕根株至於此案所獲現犯劉天元等臣現在督同

兩司嚴究爲首及皈教附和各確情從重分別定擬另行具奏所有前奏查獲羅經五十九卷羅像二軸臣謹遵旨委員解送進京恭呈御覽理合具摺奏聞伏祈皇上睿鑒再羅教經卷臣現督同兩司審訊又於丁天佑等名下究出經六十八卷連前獲之經共計一百二十七卷謹一併進呈其所有菴堂又查出從前久廢菴基尙有二十餘處似未便因其有基無屋聽其留存致啓日後私造菴宇潛居貽患臣現飭地方官查明一併估變冊報其羅像刻板現在究追銷燬合併陳明謹奏乾隆三十三年九月二十八日硃批覽

崔應階摺

閩浙總督臣崔應階跪奏爲審擬具奏事竊照仁和縣查獲羅教一案前經撫臣永德具摺奏聞奉到硃批已有旨了欽此承准大學士公傳恒大學士尹繼善劉統勳字寄內開乾隆三十三年九月十七日奉上諭永德奏北新關外查出菴堂十餘處菴內收藏經卷供奉羅像每年糧船回空水手容留托足請將皈教之人從重處治毀其經像革除菴名改爲公所仍許水手回空時棲止等

語所辦尙未盡妥協杭州各處經堂向係糧船水手所設借棲止爲名信奉羅教本應嚴禁從前雖經李衛查毀經像而房屋尙存以致故智復萌各菴內仍藏羅經羅像是其惡習難返非澈底毀禁不能盡絕根株若僅如該撫所奏將菴堂改爲公所數年之後查察稍疎伊等勢必又將公所變爲菴堂總非正本清源之道至水手棲止之所原不必官爲籌畫此輩皆旗丁臨時僱募應用更非官丁可比卽或散居各處至期自能赴幫應僱何必爲之鰓鰓過計況有漕之處不止浙江一省卽如江南湖廣河南山東均有糧船均需水手並不聞皆有棲止公所何獨浙江爲然況此等游手好閒之人羣居一處必致滋生事端於地方又有何益着傳諭永德除將本案從重辦理外所有各菴堂概行拆毀毋得仍前留存復貽後患欽此遵旨寄信前來欽此欽遵移交到臣除所有經卷已經遵旨委員解京外并准漕臣直隸督臣江蘇撫臣咨覆並將水手曹便等委員押解前來臣即提齊先經訪獲之劉天元丁天佑并抱經投首之朱光輝曹天章王世洪繆世選仲壽成韓德山程玉周成瓏虞成陳起鳳並大成菴高萬成自行投到並無經像之宋起文王德生沈世榮吳吉士楊欽余德水周

子萬吳洪明丁文學張國柱並漕臣移解水手曹便夏起雲李二楊有功馮漢雲劉聖其李三張志成陶盛李秀成即李秀山翁明山姜坤陸從敏即陸得二朱天義張明義徐克明徐國廷林士富蔣成玉呼小掌張學禮張起龍張啓瓏姚文敘秦得貴匡四張輝朱德元即朱四李國有即李四又糧道拿獲水手丁文學張國柱王二王貳王起王啓等五十八犯督同署布政使曾曰理署按察使蘇凌阿寧紹台道潘恂將各犯逐一隔別嚴加究訊俱供認確鑿似無遁情除另繕供摺恭呈御覽外該臣看得杭州府北新關外拱宸橋地方向爲糧船停泊之所明季時有密雲人錢姓翁姓松江潘姓三人流寓杭州共興羅教即於該地各建一庵供奉佛像喫素念經於是有錢庵翁庵潘庵之名因該處逼近糧船水次有水手人等借居其中以致日久相率皈教該庵遂爲水手已業復因不敷居住釀資分建至數十庵之多庵外各置餘地以資守庵人日用並爲水手身故義塚每年糧船回空其閒散水手皆寄寓各庵積習相沿視爲常事此水手皈教之由來也至我朝雍正五年經前撫臣李衛訪聞浙幫水手有信從羅教之事奏明飭禁祇緣其時但將經像毀去而庵堂仍留爲水手棲息

之區致各庵仍有私藏經像未能盡絕根株尙存二十二庵現在老庵即錢庵係朱光輝看守萬菴即翁庵係曹天章即唐潮看守王菴即潘菴係王世洪看守李菴係劉天元看守劉菴係丁天佑看守陸雲菴係繆世選看守八仙珠菴係仲壽成看守滾盤珠菴係陳起鳳看守劉菴係宋起文看守李菴係王德生看守周菴係韓德山看守閻菴係沈世榮看守石菴係吳吉士看守劉菴係楊欽看守李菴係程玉卽李應選看守王菴係周成瓏看守章菴係余得水卽戴成武看守黃菴係周子萬看守虞菴係虞成卽虞少亭看守彭菴係吳洪明卽彭應葵看守王庵係丁文學看守劉菴係張國柱看守計共二十二人均係向爲水手皈依羅教之人因年老有病遂各進菴看守或相沿收藏經卷或並未收藏經卷或舊曾學習能念羅經或並未識字不能念誦皆賴耕種餘地以資餬口每年糧船回空水手人等內有無處傭趁者卽赴各菴寓歇守菴之人墊給飯食俟重運將開水手得有雇價卽計日償錢藉沾微利其各菴借寓之水手亦不盡歸羅教之人而每年平安回次則各出銀五分置備香燭素供在菴酬神向來守菴之人是日念經數卷其水手中歸教念經者亦卽隨之如守菴

之人不會念經則惟與水手人等焚香禮拜別無夜聚曉散及煽惑民人之事此現在朱光輝等二十二菴信從羅教容留水手之情形也又有同時訪獲住居清涼菴之高萬成訊係另習大乘教緣清涼菴創於前明天啓年間本係禪門嗣緣無僧居住有已故近地民人姜漢文在內看守漢文故後該菴亦即空閉有籍隸直省之高萬成流落江蘇地方適蘇州盤門外有陳文高開設大乘教堂高萬成於乾隆二十七年投拜該堂昔存今故之杜姓爲師學念經卷乾隆二十九年十二月有在蘇另開大乘教堂之姜漢如卽清涼菴已故姜漢文之弟以清涼菴現在空閑之語告知陳文高文高卽將高萬成送入清涼菴居住令其種植桑地爲養老之計並無收留水手及授徒傳教聚衆惑人之事與信從羅教之二十二菴亦無往來交關所供在蘇投師入教並蘇州現有三堂之處與江蘇現已發覺拿獲問擬之陳文高姜漢如等案相符此高萬成入教在蘇流寓在杭之原委也逐加研訊據朱光輝等各供前情不諱再三究詰堅供祇係糧船水手借菴棲息並回空之時偶一念經禮拜酬報平安並無夜聚曉散煽惑民人及爲匪不法情事此外並無隱匿菴堂衆口如一前獲經卷名